



# Il mas-chalch da Sent

Publicaziuns officialas. Cumpara seguond bsögn.  
2003/2005  
no. 11

7554 Sent, 24 settember 2003 / rz

## Radunanza cumünala

La radunanza es gnüda fixada sün lündeschdi, **29 settember 2003** a las 20.15 in chasa cumünala.

### Tractandas:

1. Protocol dals 27 mai 2003, acta 2
2. Statüts dal corp da pumpiers Pisoc
3. Ledscha da pumpiers
4. Credit da fr. 33'000.-- per la sanaziun da la lingia d'aua Crusch – Sent in Spinatscha
5. Müdamaint ledscha da lavinas
6. Varia

## Infuormaziuns per la tractanda no. 2:

Il Cussagl cumünal propuona, sün proposta da l'uffizi da fö chantunal, da fusiunar il corp da pumpiers cun Scuol, Tarasp e Ftan. Il nomer da pumpiers da Sent gniss in quel connex redot da ca. 50 giò sün ca. 22 pumpiers. Il corp regional cun nom Pisoc vess in tuot 120 pumpiers.

Il motivs per fusiunar sun:

- augmantar l'effizienz in fond adöver da l'infrastructura ch'id es avantman (Scuol)
- scoulaziun e lavur plü professiunala dal corp da pumpiers
- spargnar cuosts a lunga vista

Il local da pumpiers in Sarandschasch restess inavant in funcziun.

La documainta per las tractandas 2 e 3 po gnir retratta a partir da subit sün cancelleria cumünala.

**Il Cussagl cumünal**

## Festa da la racolta

Chi less demuossar ch'El saja grà per la buna racolta? **Sonda, 25 october 2003** vers las 13.00 ornescha il comitè da la Corporaziun evangelica la baselgia. Tuot chi chi po portar alch frütta, verdüra o fluors da üert es fich bainvis. Sperond sün üna gronda partecipaziun As salüda

**Il comitè da baselgia**

## S-chargiada d'alp 2003

In sonda, 27 settember 2003, a partir da las 10.30, ha lö davant chascharia la schelpcha cun vendita da chaschöl d'alp ed ustaria. Amiaivelmaing invidan

**Las pauras e'ls paur da Sent**

## Radunanza generala - Società da duonnas

Invid a nossa radunanza generala in marcurdi, als 1. october 2003 a las 20.15 h al restorant Fontana.

### Tractandas:

2. Prelecziun dal protocol
3. Rendaquint
4. Data per cumanzar
5. Donaziuns
6. Bazar o stüva da caffè?
7. Varia

No sperain süin gronda cumparsa e vain grond plaschair da pudair salüdar eir novas commembras.

### **Società da duonnas**

#### **Petiziun dal rumantsch grischun in scoula**

Il Grand Cussagl ha decis, cha'ls mezs d'instrucziun rumantschs hajan da gnir stampats a partir dal 2005 be plü in rumantsch grischun. Tenor la magistraglia da Samedan pudess avair quista decisiun consequenzas pels idioms ed in seguit per tuot la rumantschia. Els han formulà üna petiziun cunter l'introducziun sforzada dal rumantsch grischun in scoula. A partir da subit fin e culs 10 october 2003 ha la populaziun occasiun da passar pro la cancellaria cumünala a suottascriver quella petiziun.

**Scoula cumünala Samedan  
Cussagl cumünal**

#### **Ballarait per homens**

A partir da **subit** ans chattaina mincha **venderdi a las 20.30, in chasa da scoula** per giovar a ballarait. Partecipants novs sun fich bainvis.

**Il manader, Christian Poo**

#### **Controlla d'abitants**

Chi chi ha intenziun da's domiciliar plü lung temp o d'abitar quia a Sent, ha da s'annunzchar infra 8 dis pro la controlla d'abitants da Sent. Al listess mumaint sun da tour cun sai las scrittüras, acta d'origen o ün attest da dmura, per deponar in büro cumünal.

Sch'inchün banduna nos cumün s'ha minchün da clomar giò pro la controlla d'abitants e da restituir la retschevüda da documainta.

Infra 8 dis es d'annunzchar:

- tras ils patruns o tras ils **fittaders l'arriv e la partenza** da lavuraints o da fittadins, chi piglian o vaivan domicil o dmura in cumün;
- **da minchün mincha müdamaint d'adresa**, eir in cumün, sco eir mincha müdamaint da manster e dal lö da lavur.

Chi chi nun observa quistas prescripziuns po gnir chastià in basa da l'art. 7 da la ledscha davart il domicil dals Svizzers (multa fin fr. 1'000.--, in cas main agravants cun ün'admoniziun).

**Controlla d'abitants**

#### **Cumanzamaint culla gimnastica da duonnas**

No cumanzain darcheu cun nossa gimnastica da duonnas davo las vacanzas d'utuon, in **gövgia 23 october**, da las **20:00** a las 21:00. Novas commembras sun fich bainvissas.

**La presidenta, Seraina Valentin**

**S Ü P**

Società d'Ütil public  
7554 Sent

**A la populaziun da Sent**

## ***Dumonda da sustegn***

### **per pudair salvar la tea dal prümbaran Prà San Flurin, sün Telf**

7554 Sent, settember 2003

Chars Sentiners

Cha la tea dal prümbaran da l'alp Prà San Flurin es fingià daspö prümavaira in proprietà da la Società d'Ütil public (SÜP) sarà cuntshaint a tuots. Cun nossa festina dals 13 lügl 2003 vaina gnü la pussibilità da muossar che chi'd es nos intent, nempe da mantgnair il stabilimaint in seis esser oriund, e da demonstrar il viver e la lavur cun far painch e chaschöl illa tea veglia.

Per pudair pagar giò noss'ipoteca, e per pudair far las reparaturas e'ls müdamaints necessaris ans mancan amo ca. 80'000 francs.

Ans güdast eir Tü?

Per üna contribuziun ingrazcha ouravant

la suprastanza da la SÜP

Dal rest At pudaina racumandar da visitar las paginas d'internet:

Cumün da Sent:

SÜP

Tea Prümbaran Prà San Flurin

[www.sent-online.ch](http://www.sent-online.ch)

[www.sent-online.ch/uetilpublic](http://www.sent-online.ch/uetilpublic)

[www.sent-online.ch/uetilpublic/tea.html](http://www.sent-online.ch/uetilpublic/tea.html)

**Agiunta:**

- vagl da pajamaint